

兩浙名賢錄

兩浙名賢錄卷之二目次

儒碩

元

侍講學士鄭景歐

弟

繆天隱主一

杭州學正劉應龜

孫居純庚

侍講學士黃晉卿潛

丁性初存

國子編修胡履信助

寶峯先生趙子永偕

孟長文夢桐

鹿皮子陳君采樵

父取青附

蔣敬之宗簡

凝熙先生聞人應之夢吉

純節先生宇文子貞公諒瑞安州同知素嘗言謹翁

丹溪先生朱彥修震亨 西山夫子陳成甫紹大

潛齋先生陳公潛剛 徐南夫疇

黃清遠景昌 史文瓊伯璿

楊元慶璉 兄瑛弟璵
孫軌同附 馬德珍道貫

松江同知丘子正世良 敖進士繼翁

申屠敬仲激 兄溶 木石先生劉仲愚希賢

陳彥理大倫 潘省中伯修

儒學梅舉洪元成欽 方以愚道歷

明

巴陵簿葉世傑子奇

滎陽外史鄭真

王如淵淵

學正俞觀光長孺

翰林校書王子謙受益

孫附

桂教授同德

孫附

陳訓導與延

吳訓導元亮

陳履中端禮

弟治從子憲附

退密先生傅淳

父時借附

汪師道與立

教授趙文祐思盛

子世麟附

黃珏

柿庄先生鄭元亨嘉

翰林學士王景彰景

翰林檢討鄭叔美棠

從兄慎弟桓附

李訓導孟瑋

弟仲瑋
李衡附

楊九疇範

衛府長史金用誠實

羅儀甫頌

祖絃父
新附

國子學錄朱叔龍文淵

子

朱克粹純

孫節
附

葉士冕黼

湖廣按察使黃孟清潤玉

趙長史季通

鄭孔明仇

贊善徐好古善述

駱則民象賢

徐光岳壽卿

學正周士亨衡

東谷先生鄭世昌延

進士盧舜用瓊

教諭包希賢瑜

司訓陳敬佐善

楚府教授詹朝宗源

教諭吾景端暉

靖安令李天錫祚

慎徽先生黃季榮顯

司訓宋用儀鴻

徐公允晟

學正方景衡銓

王司輿文轅

教授朱日章冕

都事裘天爵仁

光澤令徐子元泰

海陽令毛時正仲

野橋先生戴秉誠圭

仇教授彩

子俊
卿附

訓導李孟昭達

張蘊之琛

樂城教諭俞汝誠子良

翰林孔目支中夫立

子高孫勝
曾孫翰附

國子助教洪廷器

胡惟一純

昌平知州蔣引之

興山令王汝珮

同安令許元夫

貞一先生陸順德

光祿寺署正譚諫

攸縣令孫成叔

長史張廷光

弟景明
陽附

黔陽訓導凌時東

朱陽仲應鍾

處士范廷潤

布政司都事沈一之

工部侍郎蔡汝楠

孝廉陳獻可

徐通判文和

訓導葉尚文

周府紀善凌德容

文學許長聖聞至

僉事鍾仁卿繼元

信豐令何思仁燾

文定先生王世庶文祿

司訓許來鳳梧

子煇孫
應遠附

南川先生呂程

劉大聲鐘

子振
宗附

邵武同知諸子相燮

教授施一元乾

鶴洲先生黃子重裳

學正魯元承烈

教授戚元輔

弟元弼
元佐附

朱汝賢賢

子建侯孫
廷益附

教授卜宗周鎬

子相
附

姚坦之履道

子思
仁附

訓導朱汝明愚

父鳳
附

文莊先生吳希華榮

福建僉士

汝學宗聖

海屋先生姚翔卿翼

兩浙名賢錄卷之二目次終

兩浙名賢錄卷之二

東海徐象梅仲和氏撰

武原鄭端胤思孟氏閱

儒碩

元 共三十七人

侍講學士鄭景歐弟陶孫附

鄭淦孫字景歐處州人宋景定間登進士第知溫州樂清縣累官宗正丞禮部郎官至元三十年有以淦孫名薦者世祖召見授集賢直學士尋陞侍講學士乞致仕

歸弟陶孫亦登進士第監西嶽祠先陶孫徵至闕奏對稱旨授翰林國史院編修官會纂修國史至德祐末年事陶孫曰臣嘗事宋宋是年亡義不忍書書之非義矣終不書世祖嘉之歷陞奉翰林文字後出爲江西儒學提舉滁孫兄弟在當時最號博洽儒學之士翕然推之隆福宮以其前朝士乃製衣親賜人以爲異遇焉孫所著有大易法象通贊周易玩記等書陶孫有文集若干卷

繆天隱主一

繆主一號天隱永嘉人從西山葉味道游博學強記西山深器之後補國學生陞內舍通易書禮三經宋末賈似道蕪湖之敗主一與同舍生伏闕上書攻之德祐初以疾告歸未幾宋亡遂隱居教授晚歲雙目皆瞽大德間郡守蘄希憲延爲郡庠經師每日肩輿至齋時初製大成樂禮器祭服制度儀式必諮詢之主一雖瞽而諳練典故記憶不衰與人言亶亶無倦人有問者必答曰在某書某帙人視之果然年八十餘卒於家有易精蘊論學軌範尚書說禮記通考天隱集

杭州學正劉應龜

劉應龜，義烏人。潛心義理之學，每以古人自期。咸淳間，游於太學丞相馬驥，高其才，將以女娶之。應龜不可，乃止。由是名稱籍甚。元至正初，起爲月泉書院山長，改杭州學正，以身爲教。士遵桀，所著有夢稿、痴稿、聰雨留稿，共二十卷。

孫居純庚

孫庚，字居純，慈谿人。生而穎悟，志操端謹，孝友稱於鄉里。嘗從師力學，同舍生以其貧，斥遠之。庚不動容色，益

刻苦磨瀾夜讀申且由是問學淹貫論議宏博及門之士若桂彥良王桓陳恭皆以學行著聲其他執經請益者遠近相踵庚循循善誘離愚蒙陋劣必使知所趨向貧不能具束修者且資給之使有成業學者人人感激以爲父師邑長也其不花天澤普化咸以師禮禮之及卒貧不能歛門人爲執喪葬禮者數百人所著有雪磯集若干卷

侍講學士黃晉卿潛

黃潛字晉卿義烏人幼俊異善文嘗著吊諸葛武侯辭

登延祐二年進士第累官江浙等處儒學提舉上納祿
侍親之請以秘書少監致仕未幾召除翰林直學士知
制誥同修國史尋兼經筵官陞侍講學士上章求歸不
俟報而行帝聞之遣使者追還京師復爲前官久之得
謝而歸卒贈中奉大夫江西等處行中書省叅知政事
護軍追封江夏郡公謚文獻危素稱潛之論著如澄湖
不波一碧萬頃蛟龍百怪潛伏不動淵然之光自不可
犯宋濂贊其肇開科舉卽以儒學自奮巖然獨任斯道
之重上承朱呂道統天下學士咸知師法云

丁性初存

丁存字性初，義烏人。性質樸，不外撓，博洽群書，善屬文。尤長於詩賦，屢徵明經，不就。嘗游宗文何先生門，相與闡明理學，以邇金許之。傳晚年優游盤谷，四方學者羣趨之。所著有雲崖雜稿若干卷，藏於家。

國子編修胡履信助

胡助字履信，一字古愚，東陽人。刻志問學，悉究經史百氏。大旨舉茂才，授建康路儒學錄。吳徵過金陵，見助詩文，大加賞異，用薦改翰林國史院編修官。至順間再轉。

國子編修助狀。與清古平生誠實無僞。見人有善。亟稱之。素薄勢利。故與人無怨惡。嘗作大拙小拙傳。以寓意。所著有純白類稿三十卷。

寶峯先生趙子永偕

趙偕字子永。慈谿人。少立志不凡。初業舉子。嘗讀楊文元公所著書。恭默自得。乃悉棄舊業。尊崇之。雖處山林。恒有憂世之色。邑令陳文昭親至門受學。平居躬行孝友。日舉聖賢之言。以誡小子。狂簡學者。稱爲寶峯先生。

孟長文夢恂

孟夢恂字長文黃巖人師事楊珏陳天瑞講解經古體認精切用薦著本郡學錄至正中以設策禦寇功授宜興州判官未受命而卒賜諡康靖所著有性理本旨四書辯疑漢唐會要七政疑解及筆海雜錄等書

鹿皮子陳君采樵

父取附

陳樵字君采東陽人父取育慷慨負志節從石一鼇與聞考亭之學樵幼承家訓長受經於李直方書無不讀因研覃遺經思一洗支離穿鑿之病逾四十年乃入東白山太霞洞中著書其微詞奧義多前儒未經道者宋

濂稱其以超絕之資曠視千古若一旦暮期以孔子爲師而折衷羣言之是非可謂特立獨行而無畏懼者也。爲文自出機軸嘗言文章舍六籍弗講而事浮詞綺語何哉所著古賦十餘篇絕似魏晉一時名士如虞集黃潛歐陽玄等皆向慕以爲不可及樵性至孝父病痰咯咯不能吐樵親以口吸之母歿樵不及識見遺衣輒奉之而泣生平未嘗言利家雖素饒終其身惡衣菲食澹如也遇歲饑竭廩粟以賑里閭自取來牟續食好衣鹿皮因自號鹿皮子有鹿皮子集飛霞觀稿合數卷年八

十八卒

蔣敬之宗簡

蔣宗簡字敬之，鄞人。幼爽敏，有雋聲。程端禮歸自江東，宗簡以弟子禮謁見，留門下數歲。凡天人性命之本，古今治亂得失之迹，靡不參究。乃束書入山中，盡取易詩春秋諸家之說而折衷焉。試有司不偶，輒棄去。或謂宗簡不以壯盛挾所長，取青紫，獨用古文自詭奚益。宗簡笑曰：使吾理明氣亮，於爲文決科何有，得不得命也。文有古今之異耶？旣而遇臨川危素於金陵，語洽欲偕至。

京師以母老乃市所未見書數百卷以歸益折節讀書種學織文爲世名儒翰林柳貫見其文擊節賞異方具薦牘而宗簡已屬疾不起年三十有二人以顏子方之

凝熙先生聞人應之夢吉

父詵老附

閩人夢吉字應之金華人父詵老嘗游王魯齋之門夢吉受學家庭父子自爲師友手抄七經傳疏深究義理閉戶十年悉通奧旨學者爭趨之以鄉貢授校官累遷泉州教授前後學徒著籍者毋慮二千人隨其資質而裁補之多爲成材至正戊戌治書侍御史李國鳳經略

江南承制。授福建等處儒學提舉。辭不上。晚年避地永康之魁山。卒年七十。平生信道。既篤。函養益純。識與不識。莫不稱之爲有德之君子。門人宋濂等謂其執醇而不變。含和而有耀。私謚曰凝熙先生。

純節先生字文子貞公諒

字文公諒。字子貞。吳興人。通經史百家。弱冠卽有椽行。登至順四年進士。自高郵司理。除國子助教。六館之士資其甄陶者。性性出爲名臣。調國史院編修。以病得告。後召爲國子監丞。除江浙儒學提舉。改僉嶺南廉訪司。

專以疾請老卒公諒平居雖暗室必正衣冠端坐嘗撰
手記一冊識其首曰晝有所爲暮則書之其不可書卽
不敢爲天地鬼神實聞斯言其檢飭之嚴如此所著有
折桂集數十卷學者私謚爲純節先生

瑞安州同知葉審言謹翁

葉謹翁字審言金華人性明達於書無不讀由家傳之
端緒沂儒先之源委卓然自立許謙柳貫張樞黃潛咸
樂與爲友歷官浦江義烏二縣教諭調簿晉江授瑞安
州同知致仕卒謹翁天性孝友治家有法吉凶慶吊一

遵呂氏家範曰吾有所受之也所爲詩文和易平實無纖麗之態有四勿齋稿若干卷藏於家

丹溪先生朱彥修震亨

朱震亨字彥修義烏之赤岸人也天資爽朗讀書卽了大義爲聲之賦刻燭而成豪邁負俠聞許謙之學卽樞衣至門而師事之謙爲開明聖賢大旨震亨心解抑其豪宕歸於粹夷不以一毫苟且自恕而欲見之踐履嘗應試不利歎曰不仕固無義然得失則有命焉苟推一家之政以達於鄉黨州閭寧非仕乎其家故有祭田而

祭無恒所。乃建祠堂。以奉先世神主。講行朱子家禮。屏
釋老之教。罷濟神之祀。持公平以服衆心。排紛難。以安
閭里。人多德之。俄母病延醫。因自悟曰。人子而不知醫。
或委之庸人。寧無失乎。於是研究醫學。博求名師。得羅
知悌之傳。治症多獲奇效。嘗著宋論格致餘論。局方發
揮傷寒論辯。外科精要發揮。本草衍義補遺。丹溪心法。
學者因其所居。稱爲丹溪先生。

西山夫子陳成甫紹大

陳紹大字成甫。黃岩人。以儒學名家。元初學者爲文。競

循聲律。紹大獨以性理之學自任。爲文章必傳經義。治尚書作四書辯疑。生徒至二百餘人。並稱之曰西山夫子。

潛齋先生陳公潛剛

陳剛字公潛。平陽人。受業胡石塘先生之門。晝夜研索。遂通易詩書三經。肯要。嘗著五經問難。四書通辯。述歷代正閏圖說。渾天儀說。歷代官制說。禹貢洪範手抄。爲文章學。西京爲詩賦。效魏晉。每應試累不就。乃曰。吾學豈不如今人。吾才豈不逮古人。吾之不得命也。父母皆

八十孝養至篤。後兩目俱盲。人有求其文者。猶能夜以
運。思而且以口授。雅正高古。纍纍如貫珠。然教授弟子
未嘗有虛歲。堂上之席嘗滿。鄉里皆稱曰潛齋先生。

徐南夫疇

徐疇字南夫。一字叔範。蘭谿人。自少穎敏絕倫。力學好
修。兼明春秋戴記。而於易尤造其微。嘗言人出而仕必
行道濟時。求不負其君。處而隱必立身行善。求不負其
先。否則碌碌耳。其居家孝友。處朋友鄉黨。一於義正。直
不阿。爲文雅瞻。有法。隱居教授。學者稱爲天民。詔以賢

良徵郡邑敦請固辭不起或勸之仕曰以經淑人得之而仕是亦仕也所著有周易解微三卷禮記心法二十卷文集若干卷

黃清遠景昌

黃景昌字清遠浦江人四歲入小學十二歲能屬文長從吳思齊謝翱游益通五經諸子詩賦百家之言尤極意尚書春秋之學三傳異說學者莫知所從景昌據經爲斷作春秋舉傳論又作周正如傳考蔡氏傳正誤古詩考晚自號田居子述田間古調辭九章重紀至

元二年卒

史文璣伯塘

史伯璣字文璣平陽人自幼嗜學強記博通經史及諸子百家之說精究四書深得朱子之旨時饒氏輯講許氏藁說胡氏通旨陳氏發明與朱子背馳者乃著四書管窺以辯明之又著管窺外編論諸經史天文地理古今制度名物學者傳誦焉人勸之仕則曰讀書本以善身爲仕而學豈吾志也遂隱居不仕卒年五十六

馬德珍道貫

馬道貫字德珍，金華人。弱冠時，偕弟德璋師事許文懿於八華山，得瀛洛之學。文懿以詩期勉之，甚至文懿歿，吳臨制服如親喪。學者稱之。所著有尚書疏義六卷，詩文若干卷，自號一得叟。性恬退，非公事不入城府，棲遲衡泌，裕如也。說者以爲有古高尚之風。

楊元度璣

兄瑛弟瑀孫軾同附

楊璣字元度，餘姚人也。喜學問，師事柳待制貫與海內博洽者，談數困服之，以是名重一時。註詩傳名物類考，侍御史姚覲上於朝，後以歲貢，歷寧海縉雲及本州學

官值南北盜起避地邑之梅川以著述終兄瑛弟瑀孫
軾同並有名而軾同尤以詩顯於景泰天順之間

松江同知丘子正世良

丘世良字子正父璘由台州徙錢塘良幼穎悟讀書過
目輒解父喪奉母以居日益貧教授市中經傳子史百
家之言靡不蒐究用薦爲海鹽州教授復學田千餘畝
秩滿除杭州路教授既代授慶元路總管府知事良所
定文牘吏不敢舞文法爲奸仕終松江府同知所著有

教進士繼翁

教繼翁烏程人少長邃於經術冬不爐夏不扇日讀必
至夜分而寢雞鳴卽興以爲常由是日無不覽之書每
與人談論今古滾滾如黃河之東注然未嘗以學驕人
對僕隸亦辭色溫和進止出入皆有常度初任定成尉
以父任當補京官讓於弟尋擢進士對策忤時相遂不
仕益精討經學於六經皆有疏說發爲文章春金夏玉
以大家稱於東南有文集二十卷

申屠敬仲徵

兄洽附

申屠激字敬仲諸暨人父性受業黃文獻公之門激與
兄溶得其淵源謹言端行並爲鄉里所重而激尤寡合
望之容色毅然至有所請則溫煦和婉辯析必盡工古
文辭春容簡奧精篆籀小楷咄咄秦晉辟本路教授辭
疾不行晚節益堅有遺世獨立之意所著有孝全操言
數卷藏於家

木石先生劉仲愚希賢

劉希賢字仲愚鄞人少嗜學長從鄉先生薛觀學春秋
博習強記爲文敏疾舉進士第授太平路天門書院山

長講論經傳得其旨歸後改會稽教諭見雅樂廢弛喟然歎曰聖人制樂所以格神人和上下定民志詎可缺哉乃捐俸率諸生命工修飭秩滿陞江浙儒學副提舉致仕所著有春秋比事餅窩類稿自號曰木石子人因稱爲木石先生

陳彥理太倫

陳大倫字彥理諸暨人也始學於從兄洙後事吳淵穎先生絕意仕進以教授爲業元末避兵流子里作晚香亭日與賓客暢飲高歌舉座絕倒嘗語人曰吾平生無

他嗜唯攻文成癖孳孳。乞乞垂四十年。昔之人如此者。何限。今皆安在哉。每搔首自傷。識者亦共傷之。所著有春秋手鏡尚雅集。

潘省中伯修

潘伯修字省中。黃巖人。嘗三舉於鄉。至春官。輒不偶。遂決志隱居。教授以著書爲事。旁通天文地理律曆之學。爲詩文皆寓微意。曰文章不關世教。雖工無益也。方國珎寇海上。浙江叅政朶兒只班。總兵至。將盡屠邊海之民。伯修挺身率父老詣軍前。力爭之。曰倡亂者獨國珎

爾吾民無非也。乃得免。後竟爲國珎所害。黃雲泉有言。潘先生莫邪大劍也。其精充足以動星斗。其鋒鏘足以破堅珉而不保其缺折之患。雖然不害其爲千金之寶也。嗟夫。寧爲玉碎毋爲瓦全。其潘先生之謂與。

儒學提舉洪元成欽

洪欽字元成。溫州人。博學能文詞。平居議論必依名節。至正中爲長州縣學教諭。會張士誠陷平江。欲用之。欽抗節不屈。居數日乘間脫走。見丞相達識貼睦。言其狀。丞相重歎以爲臨難不撓真師儒也。用承制授將仕

郎江浙儒學副提舉。雖當亂世化導不衰。元亡歸卒於家。

方以愚道解

方道解字以愚淳安人。蛟峯先生之曾孫也。從同里吳朝陽先生游。以春秋名當世。登至順二年進士第。授翰林編修官。所撰后妃功臣諸列傳。筆削大義獨斷於心。無能議者。調嘉興推官。凡讞獄囚必脫其桎梏。賜之飲食。溫言和氣以探真情。再調杭州判官。遂引疾以歸。洪武初兩被召俱不赴。所著有春秋集釋十卷。愚泉詩稿。

十卷詩說一卷文說二卷選唐詩一卷

明 共一百四人

巴陵簿葉世傑子奇

葉子奇字世傑龍泉人至正庚寅以薦試方州中第四人退隱不仕國初浙江行中書省復以學行薦廷試高等授岳州巴陵簿尋致仕卒子奇少極穎悟壯遊王剛叔門聞理一分殊之旨乃知聖賢之學不貴多聞以靜爲主因自號曰靜齋所著有範通玄理草木子等書

榮陽外史鄭真

鄭真慈谿人博極羣書在鄉里恂恂然不以才藝矜人
嘗取諸家格言著爲集傳集說集論洪武初試浙闈居
首選授廣信府教授號榮陽外史

王如淵淵

王淵字如淵永嘉儒志先生之九世孫也通詩書二經
洪武三年舉進士以疾告歸淵性急直人有過必面折
之毅然以作興後學爲己任循循誘掖寒暑晨昏無倦
色貧而來學者輒以衣糧資給之所著有詩書題斷遺

壻稿

學正俞觀光長孺

俞長孺字觀光新昌人歷諸暨州學正治經敦行刻勵好修晚年所造益深其教門人務以及身自約遠近嚮之所著有心學淵源及詩文共數十卷

翰林校書王子謙受益

王受益字子謙山陰人洪武中舉明經爲山陰訓導淹貫經史尤達於春秋善指授多所發明嘗病傳註繁蕪或失作者本旨乃取諸家疏義折衷之哀爲春秋集說後召入翰林校書受益與韓宜可薛正言先後典學於

鄉至今鄉校頌述之稱三先生而不名

桂教授同德

孫槐附

桂同德慈谿人謹厚敦樸篤信好學於經史無不淹貫身若不勝衣喞焉似不能言者坦坦無兢學行聞於遠邇經生學士過從請益者無虛日教授郡庠以德行為本立諸生講下懇懇言曰窮經究史固學者事而人孝出佛尤所當先今日之孝卽他日之忠忠孝兩全人道備矣苟規規章句而踴躍不力此爲人之學非聖賢之學也故一時親炙其教者咸有成立所著有容齋集齋

孫槐以知兵拜錦衣百戶篤於人倫而儻好施有古
學士風

陳訓導與延

陳興延名延以字行鄞人也記覽該博而尤熟於春秋
宣元季盜起人不聊生悉散貲產以贍諸親舊之貧者
僅存周廬田數十畝朝耕暮讀雖際屢空裕如也洪武
二十七年邑大夫多其賢薦授本邑訓導開誘諄諄先
義後利一言一行唯恐或後古人故當時從游之士接
其模範者率知敦尚古道云

儒顧

卷之二

十七

光碧堂

吳訓導元亮

吳元亮仙居人。洪武中爲嵯縣訓導。沉静方嚴。動必以禮。講明正學。以開後進。及卒。與僚友諸弟子訣。整衣拱手。端坐而逝。

陳履中端禮

弟治從子憲附

陳端禮字履中。定海人。志操古雅。博究羣籍。動不踰矩。壺闔整肅。不聞內言。集子弟講明經術。謂聖賢之學。自修身齊家。以達於天下。寧拘拘章句邪。弟治從子憲相繼登第。爲御史。端禮作廉說以規之。嘗曰。汝輩盡忠朝。

廷不負子教則子得肆情泉石矣乃築室別墅遊心著述時鄭瑤爲郡守始行鄉飲禮以敦崇齒德親詣端禮之門迎之說者謂賓主俱賢有禪風教云所著有喪祭禮儀註解

退密先生傅淳

父時借附

傅淳慈谿人家世業儒父時借以道學鳴於鄉淳能傳其家學鄉人稱爲退密先生有洪範敷言性理聚說大學補略視志稿藏於家

汪師道興立

汪與立字師道金華人受業於范祖幹其德行與何壽朋齊名而文學似爲過之嘗謂學者當視古人爲不足毋視今人爲有餘人以爲名言隱居教授不求聞達優游林泉以高壽終

教授趙文祐思盛

子世麟附

趙思盛字文祐鄞人也博物洽聞涉獵羣經而尤邃於春秋洪武初訓導郡庠八年遷教授啓迪不踰矩矱生徒景慕後引年歸里雖在耆老書不去手時稱邃於文學子世麟克紹先志十五年聘上春官擢監察御史以

清白名

黃珏

黃珏餘姚人。初學春秋。後見四明黃彥實說尚書。心好之。乃更受尚書。隱居教授。浙之言尚書者。多宗事之。居恒對人喜談邵子皇極經世書旨趣淵妙。貫徹天人。有以自樂。

柿庄先生鄭元亨嘉

鄭嘉字元亨。山陰人。篤行寡言。性至孝。母病。嘗糞甘苦。衣不解帶。母未復。初卧不就枕。窮經好古。而於詩尤工。

與縉續唐之淳相上下。是時柯亭王佑爲侍郎，方貴顯，與嘉同里，而里中無少長，皆輕佑而重嘉。見輒曰：「此栢庄先生。」

翰林學士王景彰景

王景字景彰，松陽人。修癯美髯，平居好挾策，矢口成章，時稱其文章上繼屈宋。下並班馬。洪武間，與楊宜同舉鄉試，初授懷遠令。歷官山西右叅政，下吏以糧撓法累請雲南靖難師起，赦至京師，與修高廟實錄，以吏部尚書張統薦陞禮部右侍郎，兼翰林侍講，克總裁官。

成祖入繼大統擢翰林學士時言建文君崩上問景
葬禮景頓首言宜用天子禮上從之一時詔勅皆出
於景景居官立朝不變鄉語一日上欲出師值大雨
上不釋景從旁語曰此乃上天爲陛下洗干戈耳左右
不辯其云何獨永嘉衛士竊笑而奏之上大悅卽擢
爲親軍指揮使後徙居銅陵有詩文集若干卷

翰林檢討鄭叔美棠

從兄楷弟桓附

鄭棠字叔美浦江人也與從兄楷弟桓俱受業宋景濂
之門以文學稱永樂初用禮部尚書李至剛薦入翰林

與修大輿書成吏部銓試第一除翰林院典籍仁宗
爲太子監國南京選儒臣進講與王汝玉等九人在選
敷陳從容春待殊渥秩滿陞翰林檢討以疾告歸所著
有金史評及道山集二十卷從兄楷字叔度蜀王聞其
賢奏除王府教授賜號醉翁陞長史致仕著有鳳鳴集
弟桓字叔瑞隱居著書或以其名達之蜀王王每顧楷
曰叔瑞可謂清逸之士人遂以清逸處士稱之所著有
聖朝文纂文章正宗續文章正宗金華賢達傳進德齋
稿

李訓導孟璿

弟仲璣季衡附

李孟璿海鹽人。祖元白以賢良方正起家。官嘉興副總管。清白有吏績。璿永樂中以經明行修被薦。歷嘉興汝寧訓導。教養有法。士風蔚起。所著有南庄集。弟仲璣季衡皆有文行聲譽。重於一時。

楊九疇範

楊範字九疇。鄞人。踐履誠確。雖燕居恒盛服端坐。讀書至夜分不懈。教授里中。視世之毀譽榮辱。漠如也。永樂間有巫稱龍神道人禍福人如影響。家趨戶迎。官不能

禁範作文喻之弗止躬往見巫梓其首匍匐於地時擁
巫羅拜者百數十人皆驚悟散去郡守鄭瑤邑令張鐸
咸賓致以訪政事所著有四書直說道統言行集孫守
陳守隨守隅守陞魯孫茂元茂仁皆登顯仕各有傳

衛府長史金用誠實

金寶字用誠衛之開化人自幼穎悟絕人書過目輒成
誦屏去浮靡專意經傳弱冠補博士弟子識者目爲重
器歲壬午太宗入繼大統實稱布衣詣闕上書

太宗善其言復親策之對稱旨命入翰林與修太祖

皇帝實錄書成，擢翰林典籍，修永樂大典，未幾，選爲東
官講官。以外艱去，服除，陞左春坊司直，卽日侍經筵，講
說詳明，有良佐之褒。復以內艱去，哀毀成疾，踰十年始
起任職。仁宗登極，簡宮僚爲諸王輔導，乃授衛府左
長史。復召入西掖，纂先正格言，以備顧問。丙午，歸謁先
塋，恩賜優厚。拜奠既畢，日召鄉黨宗戚相與燕樂，以榮
上。賜正統嗣位，郊祀謁陵，悉以命王，左右之力居多。未
幾，王薨，哀感成疾，上疏乞骸，命下而卒。年六十九。實天
性孝友，少肄業學官，以不得奉旦夕，惟朔望歸省，必奉

賜上壽以悅親心。愛季弟老而彌篤。周貧恤難。不吝所有。故人林文節卒於京。親爲殯。歛歸其喪。閱經史。日有程限。或有事妨。夜必補之。不以寒暑少廢。故諸經子史。悉能探其賾。而知其非。嘗曰。人不能無非。覺而正之。斯善矣。遂伯玉行年五十。而知四十九年之非。仲尼以爲君子。因以覺非名齋。爲文章。春容暢達。理與氣俱。詩則和平冲淡。無雕琢之病。有集若干卷。藏於家。

羅儀甫頌

祖絃父新附

羅頌字儀甫。山陰人。祖絃。父新。並以儒學名於時。頌性

淳樸鮮嗜欲力敦古道能讀祖父書過目輒成誦當其
會意時雖食寢亦不自覺經史百家古今載記及佛老
諸書裨官小說罔不攬竒鉤玄著之篇章爛然成一家
言弟子及其門者各有所就褒衣博帶從容曳屣見貴
勢無加禮人亦不敢以貴勢加之太守戴琥崇禮隱逸
於頎猶注敬焉嘗聘修郡志未成而歿然文獻賴以有
徵所著有易齋札記及詩所訓詁詩話二百餘卷稱梅
山藜書羅氏三世隱梅山各以文學鳴於時卓爲越之
儒宗云

國子學錄朱叔龍文淵

子宜附

朱文淵字叔龍山陰人洪武間以太學生請闕陳時政
忤旨謫戍。雖歷顛沛而志行益堅。宣德丙午大臣薦其
直節。宜錄用授滑縣訓導。講學行禮以身先多士。化及
齊民。擢國子學錄。尋致仕歸。年已大耋猶手不釋卷。郡
大夫政有所疑輒造其廬問焉。不敢以阿導先其爲。隆
禮如此。子宜亦世其春秋學。以孝義聞。

朱克粹純

孫節附

朱純字克粹山陰人博雅有儒行以明經教授鄉里能

詩風格高古。與邑人羅頌、張勗、章結、鑑湖吟社太守戴
琬深敬禮焉。所著有陶鉛、驢背自怡等集。其孫節起家
進士官監察御史。按山東，振舉憲綱，統兵勦賊，卒于師。
朝廷憫其死事，贈光祿寺少卿。

葉士冕補

葉蘭，字士冕，太平人。博通經史，真知實踐，以古道自持。
貧而好施，授徒所得束修，恒均鄉族之貧者。嘗折衷學
庸衆說，摭取朱子語錄及黃超然通義相發明者，附周
易本義，繕錄未終而卒。學者惜之。

湖廣按察使黃孟清潤玉

黃潤玉字孟清世爲鄞人永樂初徙江南富民實北京父良富行玉時年十三詣官請代官少之對曰父去日益老兄去日益長官異而從之抵京受廬北城外十里所沙漠沍茫無人烟玉與同役築室而居傾貲給徭役墾闢膏蕪以爲生稍隙輒肆力於學以已心爲嚴師而新造於聖賢擇然後語揆然後動間爲文辭不作組麗新刻之語而理致淵永補郡岸生以禮經魁北關會試乙榜授建昌府學訓導改南昌以薦拜行在交趾道監

察御史出按湖廣，威望赫然。正統初，薦陞廣西按察提學僉事，屏浮薄，獎賢俊，士風丕變。改湖廣按察司使，以不肯屈節上官，被誣劾，不諳刑律。左遷含山知縣，請老致仕歸。以子隆貴，封南京刑部主事，居家簡出，日惟玩味經義，無厭足。平生著述甚富，以朱子嘗欲編禮記附儀禮，迺取儀禮分爲四卷，而以禮記比類附之。又以五禮獨缺軍禮，因取周官大田禮補之，而以禮記諸篇載田事者附焉，別爲一卷，通爲之註釋。總曰儀禮戴記附註，以小學四書諸經註家或遺或誤，撰經書補註，以大

學中庸旨皆淵奧，撰學庸通旨，以禮記深衣制十有副，鄭氏誤註爲裳，遂撰考定深衣古制，嘗因安遠侯柳溥問古兵法爲註，孫子其他備論理事，曰南山錄，雜著詩文，曰南山稿，皆藏之家。

趙長史季通

趙季通，天台人，力學篤行，稱名儒，由教官，知永豐龍溪二縣，寬厚愛民，以最召與修。高皇帝實錄，累遷國子博士，進司業，與董子莊同被選爲趙府左右長史，二人皆端平，有操守，隨事規益，不肯詭隨，以希寵遇，每侍講。

讀多所開悟。王重之折節降禮。稱之必曰先生。當時論親藩輔導之良。以二人爲極選云。

鄭孔明伉

鄭伉字孔明。常山人。性穎異。負志不羣。博通五經諸書。尤長於易。初補郡博士。弟子員旣歷游。丁息軒吳康齋之門。遂棄時學。務求實踐。確然以聖賢自期。事父母存殁盡禮。立義塾。義廩。以教。贍其族黨。孝義之稱。內外無間。督學使者屢辟。應試終不出。所著有讀易管見。易通發明。觀物餘論。卦贊。蛙鳴。諸稿。藏於家。

贊善徐好古善述

徐善述字好古，天台人。逮於經學，工爲詩，以薦授桂陽州學正，持身廉慎。士子欽之。陞國子監助教，同官侯復性剛急，善述婉曲諭之，復自是忿戾消沮。每遇善述曰：我見公心輒惓然如飲醇，公真今之叔度也。仁宗在東宮，簡入爲官僚，授左春坊司直郎，每作詩，使善述指摘數過，乃已。冬，自書唐製以賜之，善述亦夙夜匪懈於文事，多所啓沃。仁宗每見聽納。陞右贊善，以疾卒於官。善述爲人淳厚質實，學術端正，耿介恬靜，不爲阿附。

仁宗卽位追念輔導之良贈太子少保謚文肅命有司立祠墓側歲以春秋祀之。

駱則民象賢

駱象賢字則民諸暨人篤行好學於書無所不窺爲文直述事情不求華緻時嘗斟酌六禮要表帥鄉俗鄉人化之爲園於楓溪之上圖書滿屋至老玩讀不輟家素饒值歲飢出粟千石以賑朝廷賜勅旌異仍復其家所著有羊棗集篤終易覽溪園遺稿歸全集等書。

徐光岳壽卿

壽願

卷之二

光碧堂

徐光兵字壽卿新昌人郎中志文之子也自幼聰敏好學尚氣節不妄交游請於父曰兒不能爲舉子業取科第願盡讀天下書使行已無媿古人可乎父許之乃結如斯亭藏修其中日夜研究羣書至忘寢食既而克然有得乃從父友陳獻章莊景革心聞見踐履益到年方壯人卽目爲巨儒景尤加愛重春日春風亭以居之其詩文賡唱往還載景集中

學正周士亨衢

周衢字士亨平湖人篤學慕古樸雅弗事華靡景泰元

年領鄉薦任膠州學正以禮幸人訓迪無倦諸生有衣食弗給無力喪葬者出俸助之致仕歸肆力經史所著詩文追躅古人立心行已無不可對人言者

東谷先生鄭世昌延

鄭延字世昌海鹽人其先有元璠元琰者俱以學行顯延性孝友方正博學能詩文以尚書教授門人以其業顯者三十餘人皆尊之曰東谷先生天順壬午貢太學成化乙未授廣東市舶司副提舉諸番無敢以方物及門者白沙陳獻章贈詩曰溪魚海舶各歸去明月自照

美容峯黃門張寧稱曰力學能文通知典故吾邑未之
或先歷仕二考以疾卒於任

進士盧舜用璣

盧璣字舜用松陽人家貧力學懷抱甚高天順甲申第
進士廷策近萬言皆切中時弊李賢當國欲羅致之不
屈遂上疏請正官闈名分及闈寺引浮屠圖煽惑事言
甚剴切執政外忌萬妃內短疏入不報未幾復詆權奸
謫戍銅鼓汪直臨邊諷使見之許其入朝璣曰此膝不
屈於人久矣益厲志理學辯論古今未定之說其闢元

劉謫三教平心論可與佛骨表並稱作真字補遺十月
其圖說深得聖賢之旨其雜論責宋舊臣遺士不應仕
元異端不生於天地之前與訂誣諸說俱出人意表
孝宗皇帝在東宮已聞其名卽位首詔起之已不可復
作矣

教諭包希賢瑜

包瑜字希賢青田人窮經博古篤學力行一言一動無
不以聖賢爲法由舉人任教諭非其好也淮王聞其賢
脩書幣聘進講便殿輒稱先生所著通鑑事類一百二

十卷左傳事類四十卷王閔之喜甚遂梓行仍命工肖
瑜像親爲之贊曰見道之真履道之正咳唾古今寤寐
賢聖傳獵經蒐回瓢點詠衣冠肅如後學企敬君七年
告歸投老撰述甚多以壽卒

司訓陳敬佐善

陳善字敬佐海鹽人天資穎悟性豪邁與方洲張寧同
時相伯仲銳志勤學攻古文辭每飲酒半酣捉筆立就
數十言文不加點意味深長辭調高古屢試不售以貢
業成均安貧自樂不以仕進爲念邑令李雲造門敦

勅始出就崇陽司訓未幾致仕歸性潔亢與止寡儻儻
粟屢空未嘗苟取一介求詩文者非其人雖重幣不受
人以是益高之

楚府教授詹朝宗源

詹源字朝宗松陽人任湖廣楚府教授初見王無所餽
獻以二帝三王之道上啓王喜其言及掌簿正司出入
却分例王益賢之常語其世子曰詹先生學行近古剛
方正直汝宜師之幾三年辭歸構屋一區與子姪業儒
者居之及定房籍請書契源曰汝居之卽爲汝屋焉用

卷之二
三
契爲平居足跡不入公門。邑大夫重其儒行。數就見請。益見所居庫陋。請撤而新之。源固謝不許。或問之。源曰。此先世所遺。可庇風雨足矣。且吾生於斯。長於斯。朝夕。饜粥於斯。亦將正寢於斯。以待盡而已。無事而更新之。令子孫何以師先世之儉。邑大夫聞而嚴重之。終其任。不敢輕以寸幣相餉。

教諭吾景端

吾暉字景端。開化人。方正端嚴。動由規矩。中鄉魁。教諭江浦。乞歸講學。自怡。弟子千餘人。隨其分量。咸有所得。

皆成名士。主事林沂、潘府常同陳獻章。章懋薦之，謂醇
儒可大用。聞望顯著，人咸以不得見爲歎。與章懋、樊瑩
尤契厚。年七十卒。門人方豪狀其行，章懋表其墓。有曰：
君之所詣，茂叔、伯淳人之所惜。何蕃、劉蕡所著有朱子
讀書法、還山稿、五箴解等書行於世。

靖安令朱天錫祚

朱祚，字天錫，海鹽人。生而警敏，七歲日誦數千言。甫成
童，學爲古文詞，遍訪士大夫家遺書讀之，惟日不足。成
化丙午，以尚書領浙薦，一試禮部弗售。以母老不再行。

投尤沃令。有惠政。改江西靖安。治靖安如尤溪。民皆稱之。曰。豈弟甫二年。疽發背卒。祚氣宇冲融。尤喜獎引後進。其學以五經爲本。發之詞章。春容麗蔚。一根羣髮。嘗慕司馬溫公爲人。歲置一冊。動必書之。以自警。所著有拙齋漫稿。雲谷集若干卷。

慎徽先生黃季榮頌

黃頌字季榮。遂昌人。博學自淑。不樂仕進。人多與之遊。嘗語人曰。爲學大要在慎徽五典而已。舍此皆贅麗也。有慎徽遺稿言多簡要。門人私謚爲慎徽先生。

司訓宋用侯鴻

宋鴻字用儀開化人夙負異稟致力遠大學務深潛每事必求實踐嘗受易於吾俾爲所器重爲文典雅有則四方從遊者甚衆端本正業多所造就鄉人敬信皆呼先生有疑必咨有過惟恐其或聞焉應貢司訓宜興以道自尊身爲模範士民愛慕人人以爲父師居恒手不釋卷對妻子如嚴賓至於聲利泊然若遺人不得而窺其際也卒於官士民奔走痛哭雖深山窮谷耄夫稚子亦嚔吁泣下所著有白石漁溪慈石缶音諸稿藏於家

徐公允晟

徐晟字公允，海鹽人。資性穎敏，經史墳典靡不周覽。與朱祚俱以博洽稱。每相遇坐，談古今佚事，移日不去。嘗曰：聖人之教達於中國，釋氏之教達於四夷。孔子欲居九夷者，殆化夷乎？其得悟而言類如此。王大容、衡、按、海上，命取韻府考事，得之眉間。註云：出漢雋，詢知晟。命延人禮敬之。問漢書數事，詳對無失。稱曰：徐漢書所著有左傳摘事，燕石存稿。

學正方景銜

方銓字景衡新城縣人成化中由舉人任湖廣安陸州學正奉父之官更爲創寢室於學署且暮具衣冠至寢所問省與居或燕飲歸雖丙夜不釋衣冠必徃侍左右俟其寢而後退易學通明躬授諸生課業講習不怠業他經者則延訪隣郡經術通洽之士爲之師一時成材特盛如孫交劉洪其最著士也及丁外艱歸諸生泣送不忍別服闋改汝州卒

王司輿文轅

王文轅字司輿山陰人七歲時拾遺金一鏰坐待失者

歸之。其人欲畀以半，却不受。既長多病，遂習靜隱居。勵志力行，鄉人咸樂親之。每讀書，多自得，不主陳言。故其說多與時左。惟王文成與之友，莫逆也。文成領南贛之命，文轅語其門人曰：陽明此行，必立事功，問其故曰：吾觸之不動矣。及文轅歿，文成講學時多訕之者，歎曰：安得王司與復作乎。所著有茹澹稿、皇極經世、律呂諧書。

教授朱日章冕

朱冕，字日章，嘉興人。以鄉貢授崑山教諭。經學舉業皆。有師承，課子弟嚴而有法。以故多所成就。崑山自冕爲。

教後其徒鄭文康及葉盛輩始擬高科刻文爲程至今稱善教者必曰見尋遷鎮海衛學教授其教亦如崑山

都事裘天爵仁

裘仁字天爵處州衛人也嚴毅端方言笑不苟居常授徒克敦師道括郡名士多出其門諸生侍立終日不敢傾側有程門立雪之風中弘治己酉鄉試任北京都察院都事以乞養歸仁事二親備極恭順每母怛怒卽夫婦長跪席前必得惟心方起造謁有司並無請託其持身以正見得思義至老不衰

光澤令徐子元泰

徐泰字子元海鹽人聰敏豪邁領弘治甲子鄉薦授桐城學諭師道克尊士風興起癸酉典江右文衡得雋爲多進蓬州學正蓬去鄉萬餘里山川險隔豁然大觀置生死於度外登臨弔古文章益進陞光澤令歸晚攻古文詩詞識者以爲雄健過於張寧華蒸超於朱祚所著有玉池稿玉池談屑春秋鄙見女學詩談泐益志梓行

海陽令毛時正仲

毛仲字時正松陽人學有源委好關異端尤精圖學嘗

誦節孝徐先生三善之言以自砥礪篤行孝友以賓貢
授海陽令仗忠信敦教化吏民不忍欺然素性耿介當
道不合甫朞月遂謝事歸所著有常道異端論及理數
啓鎗

野橋先生戴秉誠圭

戴圭字秉誠鄞人潛心易學踐履篤實居常語人曰學
要謹獨誠意以修身不怨天不尤人久之則與天一嘗
揭諸屋楹曰人中合下渾無我地上元來都是天張尚
書邦所見而亟稱之其徒汪中丞玉嘗言曰吾執業戴

先生門時先生年甫三十餘貌甚莊氣甚和言甚簡重動止甚矩度讀書能精思其所造可謂深且微矣時所業不過時業而能不屑屑焉每題玉古入之道至於今思其言不忘云圭性謹厚言動雍默衣冠儼然至時時與親友高會談道理論當世事竟日不休未嘗出一時俗語至易箴之日語子乾曰大學語孟首章皆是天命之性聖賢之言一轍也又曰我平日所著書却是有用後來必有知者所著有易經大旨四書要略及要說等書藏於家人稱為野橋先生

仇教授影

子俊卿附

仇影海益人少穎異書過目輒成誦爲文根極理要十
舉不第始勉就貢授硤江教一遵胡安定教授蘓湖遺
軌士多成就其子俊卿博古好學任南成均修海益志
當嘉靖時海塘圯令子原叟凱奏部覆修築迄今頌其
功不衰

訓導李孟昭進

李進字孟昭嘉興人力學至忘寢食比長通五經尤深
於春秋博極羣書爲文章春容宏辯尤工楷隸行草母

喪哀毀致眇。一日不復求仕。太守齊政起爲郡學訓導。造士之功爲多。

張蘊之璪

張璪字蘊之。味人也。天性孝友。父跛不能行。背負終身。弟亦病癩。贈之至老。嘗從羅紘學經史。一覽不忘。爲詩文。椽筆立就。所著有騷齋集二十卷。擬騷二十章。大爲詞家所膾炙云。

樂城教諭俞汝誠子良

俞子良字汝誠。山陰人。領順天鄉薦。潛心聖學。力敦古

道平居無戲言議論侃侃務砥礪名檢未嘗以一事干
有司初教諭樂城舉俗不知有禮則諄諄以禮誨之未
冠者躬爲之冠有婚喪者爲之品式使遵行焉樂人感
而化之雖婦女亦呼之爲俞夫子遷肅寧令治邑事如
其家甫踰年百廢具舉臺使者待以殊等然竟以勞瘁
卒樞還之日灑然敝篋所著明學錄通禮節要尊親錄
樂居司牧二集

翰林孔目支中夫立

子高孫祿曾孫大綸附

支立字中夫嘉興人事母以孝聞舉鄉試歷官翰林孔

自與羅倫相友善務敦本爲己之學爲詩文多有闢世
教語尤深於經學號支五經子高孫祿皆貢爲學博曾
孫大綸舉甲戌進士以經學世其家

國子助教洪廷器傳

洪○隴○字○廷○器○壽○昌○人○天○資○穎○悟○年○數○歲○父○口○授○尚○書○過
耳○不○忘○稍○長○博○綜○子○史○自○家○下○筆○爲○文○如○川○涌○波○騰○數
千○言○立○就○父○早○喪○哀○毀○成○疾○自○肖○小○像○於○室○旦○夕○饋○食
如○事○生○額○進○德○庚○午○鄉○薦○授○福○建○邵○武○縣○學○教○諭○其○俗
尚○鬼○而○佞○佛○隴○至○卽○移○文○執○政○革○之○捐○俸○廣○置○學○舍○館

諸生之貧者而衣食給之故一時多所造就薦推國子
監助教。疏時宜人事出判鳳陽以不能諧俗歸乃築室
蓮谷精研理學貫通六經妙契一中之旨毅然以明道
爲任士類宗之所著有讀易索隱大學參義中庸通旨
八詠析言等書行於世。

胡惟一純

胡純字惟一會稽人少從陽明先生學天性孝友家貧
無書每假抄以誦晝夜不輟遂以明經稱執贄稱弟子
者常數十人藉束脩以供甘旨父母安其養如大烹對

書終日危坐不妄言笑動止必飭其教人必率以規矩
歌詩習禮不從事章句諸弟子旦夕供使令至種藝脩
浣皆欣欣任之不辭師弟之間庶幾復見古道以故出
其門者多知名士所著有雙溪稿詩禮抄泗州志崇安
志及卒郡守洪珠高其行題其碣曰明逸士朱純墓

昌平知州蔣引之經

蔣經字引之開化人事繼母篤繼母待之益嚴而經
之孝敬益不衰卒化繼母爲慈母甘苦茹辛刻意問學
端重沈默日危坐一室與聖賢爲伍非其人不要接一

言領鄉薦會試不第益閉戶誦習不輕以片刺投郡邑
郡邑嚴重之已而謁選知順天昌平州董七陵祀事清
慎不阿綽有政績以疾乞南竟卒於京邸士大夫咸情
之所著有性理集解易經講義

典山令王汝珮儒

王儒字汝珮嘉興人篤學力行鄉邦稱為宿儒正德丙
子舉於鄉初令星子再令崇陽聲績茂著以艱歸服闋
不樂簿書告改順天府學教授北地鮮學加意造就一
時弟子如嚴滋李以楊君璽等俱成進士滋初居塞外

徙置學。傍教之後。任本府太守。所以報師之誠。極篤而
儒益自重。未嘗以尺一千之。轉興山令。致仕歸。以詩文
自娛。優游林下者三十餘年。

同安令許元夫仁

許仁字元夫。仁和人。明經篤學。開門授徒。方嚴介特。翕
然爲時所宗。正德庚辰。以舉人授巢縣教諭。擢河南鄆
城令。勤於撫字。稱循吏。以狷執不能事上官。調德化。德
化瘴鄉。民獷悍難治。仁一以簡重鎮之。調同安。治同未
幾。屬德化豪右以舊憾騰謗。遂罷歸。仁襟茂質直。多介

少通執義而性率多齟齬然遠於經學毅然以宗正關
邪爲已任諸所論著皆折衷六經多發前人所未發云
貞一先生陸順德贊

陸贊字順德海鹽人雅好文學博集羣書巧思溢發爲
文章以多能見稱目就雅望凡縉紳道出是州者必問
其名行已嚴毅莊重晚年益自持暇日則杖屨徜徉林
圃間平居燕坐輒復尋討國史嘗以世俗湮於佛老憚
禮文之難而喪不成葬者若喪撮要一書以訓世平生
文字思緩筆精無急就之作年八十三卒鄉人誄之曰

貞一先生

光祿寺署正譚諫

譚諫嘉興人博學篤志稱明經以貢謁選時司選曹郎諫門下士也欲授判泉州力辭之乃調南京光祿寺署正散局可以著書自公之暇手不釋卷四方從游者戶屢常滿相與剖析疑奧當食每爲不舉欣如也卒於官貧無以殮諸門人共襄其事云

攸縣令孫成叔景時

孫景時字成叔杭之右衛人也性耿介於世寡諧與越

人汪應軫、仁和邵銳、江暉、錢塘吳鼎爲友。慕章文懿、胡
端敏之爲人。師事陽明甘泉二先生。學成正德丙子。舉
於鄉。筮仕長洲教諭。遷攸縣令。却餽贖。謝常例。雪貧民。
唐如景、吳伯先、寃狀。逮豪右。易滔發其奸贓。論如法。人
多稱之。無何解官歸。乃蒐輯故典。証以長老舊聞。質諸
鄉評。作武林文獻錄。杭州府志。欲勒成。郡乘副在名山。
惜有志未寃而卒。

長史張廷光景明 弟景賜附

張景明字廷光。山陰人。舉弘治進士第。以經術選克典。

府長史事。獻帝於瀋邱忠慎不渝嘗敷陳六事。帝悅命揭諸宮門。世宗入嗣大統以輔導。先帝功召赴京將大用之會病卒。贈太子太保禮部尚書文淵閣大學士謚恭僖錄其子元藩元恕弟景賜亦以進士爲御史當武宗駕留宣大率諸御史疏請回鑿忤旨廷杖又劾江彬許泰冒封伯爵非制人多其直後出知潮州尋罷歸。

黔陽訓導凌時東震

凌震字時東歸安人少有俊才博綜羣籍曉析百家言。

長游郡庠試輒冠軍及科場輒不利若有尼之者僨任
多咤惜而震恬然不以動其心久以原次貢於南宮選
授黔陽縣學訓導當路重其學行到官月餘即命提督
寶山書院選拔名流俾授學焉震嚴立科條陳說倫理
之懿啓迪性命之微勸能懲惰率以身爲切劘文章規
格親爲點竄造就士類一時多成材震念黔陽去吳興
八千里遠違墳墓非孝子心遂以老乞歸震初以鉤索
富聞器比中歲幡然守約務實一其歸趣嘗曰道學不
在多言只人倫日用之間盡吾心焉耳故其事父母先

意周旋。甘旨之具不煩。二兄居常坦坦。不爲町畦。而與之接者。鄙吝之心自消。善古文。尤工於詩。涵蓄積。審清。嫉悲壯。一時名士未識面。輒已誦其篇。休有練溪集。若干卷。藏於家。

朱陽仲應鐘

朱應鍾。字陽仲。遂昌人。天資警敏。篤學勵行。嘗結青山白雲樓。讀書其中。家故饒。一委之兄弟。修用廢業。不問也。聞王陽明先生。倡道稽山。徒步往從之。深爲器重。一時名人士。如開化方豪。青田陳中州輩。皆與之遊。著聲。

吳越間年三十二而卒士林痛惜之

處士范廷潤瓊

范瓊字廷潤會稽人少從王文成游卓然以古聖賢自期晚歲所造益深家貧無旦夕儲嘯詠自若人莫能窺其際嘗謂人曰天下有至寶得而玩之可以忘貧作古詩二十章歷叙道統及太極之說以自見幼孤事母至孝教授於鄉以供甘膾二兄早喪竭力葬之撫其子如已子平居無戲言步趨不越尺寸里中人無老幼皆以范聖人呼之與人煦煦無倨容士大夫咸樂從之遊或

間以累帛周之堅却不受也年八十有六將屬績猶戒其子曰我死寧薄歛毋妄受人賄以污我其平生廉潔有如此有司屢表其閭立石里中曰范處士里

布政司都事沈一之祭

沈祭字一之嘉善麟瑞鄉人少負奇穎年十二就試省闈爲八校之雋盛氣濶步縱睨無前已而師事東溟張先生福友善魏莊渠校邵端峯銳諸名士晚卒業於五清劉夫子瑞德義漸涵日與之化闇如退如頓非舊念向之縱睨無前者今而反觀不見有已也益自淬勵晝

夜研討諸經。盡發諸儒未發之秘。屢試不售。卒以貢授
江西布政司都事。非其好也。竟拂衣歸。時島夷寇暴。三
異。槩抱宗祖祭器避之。郡城無何疾作。卒於嘉禾寓舍。
年七十有二。槩細大之德。無不篤慎。槩孀而事父母。尤
以孝聞。生平口不非俗。而行亦不染俗。急義輕財。有如
飢渴。羸業晚置。自安無營。著布菜翁傳以見志。其於豐
約盛衰之際。蓋有得於易而無繫心。故超脫乃爾。文章
非有闢風教。不漫作。所著有鄉約釋義。筆思記。時務議。
詩文集若干卷。藏於家。

濮大川淮

濮淮字大川嘉興人少爲名諸生篤學好脩以名節自喜數竒不售貢授延平教諭身先範士矜佩之間無交色而人自濯磨時值倭寇與其令擘畫城守民恃以生時稱有用真儒致仕歸閉門讀易深明畫前之理年八十五豫知死日先期告廟與知友別賦詩端坐而逝

孝廉陳獻可言

陳言字獻可雁洲處士謙之子生而秀穎稱神童稍長以尚書爲諸生祭酒試輒冠軍徐太守盈推爲七校之

送遣幣使從吳南溪先生游吳門多俊士而尤器重言
每歎曰此子海上鳳麟也辛卯以選貢卒業南雍丁酉
領應天鄉薦旋罹外艱辛丑計偕不第卒于邸年僅四
十有一言性孝友痛母陸早世遇蒸嘗輒流涕嗚咽不
食飲者數日事繼母如生母撫異母弟如同胞時時提
耳曰吾家世孝友幸毋忘雙雁之什故弟亦莊事之說
者謂陳氏世不乏二難接人夷易無情容無傲辭至見
義必爲則英氣勃發里中有二三守節婦有司莫聞倡
義白之竟得歲時存問以終厥志其慷慨好義類如此

言雖篤志舉子業。然博綜經傳。探索子史。凡所研解。卽
繩書於眉鬢。層透髓。庶人服其精作五經疑若干卷。出
人傳註。酌以己義。多先儒所未發。端居墓古。慨然以經
濟爲己任。作策百餘篇。歎曰。假令吾得與大廷執此往
耳。所著論。馳驟橫殆。逼蘓氏而理趣一歸於伊洛。粹
如也。王孝廉文祿評之曰。獻可論如古剎精蘊。迴廊傑
構。鞏宇重門。變奧曲折。纖悉畢備。而鑿密無痕。又如臯
陶聽獄。剖析疑隱。如伏生授書。佶屈聲牙。如良平運謀。
發機透穎。時以爲知言。以子所學貴。贈中書舍人。所學

字行父嘉靖丙辰進士以中翰拜工科給事中外艱服
闋補吏科改戶科右前後上章凡二十餘皆當世要務
同官所不敢言者爲樞貴所忌出守河間摘發如神明
諸豪右畏縮不得逞遂嗾臺使者以誣劾歸未幾而新
鄭相起道出河間問父老知故太守賢折簡爲之勅駕
默不應後按浙者輒欲得其罷官狀白之朝所學笑謝
曰仕者嘗鼎一臠足矣奚所屬厭也竟不得其狀而罷
買一椽西居名其山與亭爲一笑因自稱一笑生作一
笑生傳以見志卒年六十有四

徐通判文和

徐文和嘉興人領嘉靖丁酉鄉薦任揚州管馬通判以
操實不善逢迎上官論罷歸家杜門不入公府躬督耕
志究心理學臨終語其子曰我死之後皇極經世之學
不傳矣親槌算子與諸子講究講畢而逝

訓導葉尚文素

葉素字尚文青田人由選貢任訓導以禮致仕事父母
以色養兄弟白首不二內外無間言身若不勝衣而是
非可否有義存焉與陳中州同學亦同志起素每言曰

氣節文章吾畏陳子至其間然自修渾然無迹吾視陳子似有微長聞者信之所著有四書節釋易經美記宋元綱目斷隙覲集

周府紀善凌德容瀚

凌瀚字德容蘭谿人性端方涉殺弱冠卽負大志不規科舉之業早游楓山先生之門得其標的言行必期信果步趨必由規矩閒居正襟坐雖盛暑不去巾襪對妻子如嚴君終日無惰容遽色與學者言尤嚴義利之辨嘉靖乙酉以易經魁兩浙益肆力學問凡天文地理

名物度數。以至禮樂兵刑漕運水利之類。無不究心。四方從遊者日衆。各因其材而成就之。謁選得泰寧教諭。是學僻處山中。士子多朴少文。瀚日與諸生講明理學。且立爲條約以正其趨。貧不能自給者。則分俸資之。九年如一日。諸生皆敬之如神明。親之如父母。陞周府紀。善諸生。揮涕送之者數百人。至則剛直自持。輔王以禮。其所上崇德講學等書。辭嚴義正。王甚敬焉。以疾卒於官。所著有羣書類考。太平策略。邵武泰寧等志。金華正

文學許長聖聞至

許聞至字長聖海塩人七歲洞了易經大義十三補弟子貞一、黃稱雋弱冠聞從父九杞山人聞發陽明先生良知之旨豁然悟入因殫精性命之學視舉子業意殊不屑也事父母備極色養時倭寇海上一夕侍其父從邑中歸遇賊於途同行者皆被害聞至舍舟登陸急負其父跣足邁行數十里脛血未殷得免於禍及居喪哀毀骨立經紀葬事露宿者數月弟求析著器物田廬自取其敝陋者悉以腴業讓弟終身代其役至破家不恤

處宗族鄉黨執護守下未嘗見疾言遽色有犯而不校之風督撫阮山峯鷄相與有世誼且同研席者數年先後貽書招之終不肯一見曰吾媿夫青衿而曳裾者其介節如此所著有易經微言若干卷明自成弘以來祀於鄉者朝貢封公而外無布衣聞至歿後數十年懿行益著學使者采公論而尸祝之以諸生入祀自聞至始僉事鍾仁卿繼元

鍾繼元字仁卿桐鄉人窮經博古於書無所不窺而尤精於易理數之學妙悟得於畫前以嘉靖壬戌進士歷

官嶺南僉憲以最移楚積勞邁疾卒所著有易窾易學
易老易占易原子史雜著道德要覽羣書選要京房康
節辱蒙畫前錄渾象析觀定性演義陰符經註

信豐令何思仁燾

何燾字思仁麗水人也少聰睿端凝加以父格教導之
嚴自志學卽毅然以聖賢事業自期雖習舉業而洞究
性命本原不爲捷取計以鄉薦授新喻教諭教人務底
實用士多成材聘主湖廣鄉試號爲得人令信豐以寬
仁爲理民常見思居家孝友出諸天性府縣改歲一謁

外未嘗干以私所著有四書集義春秋主意效學紀舒
嘯東臯篇滄螺錄青桂軒集若干卷藏於家

文定先生王世庶文祿

王文祿字世庶海寧衛世將軍之胃生負奇質喜讀書
好舞劍自六經廿一史諸子百家以至天官地志貝函
蓋笈龍韜虎鈴無不購之舌抄而置之腹笥每抵掌天
下事口哆噏如縣河意所不合輒拔劍而舞人皆以爲
蚩文祿亦因而蚩之不校也嘉靖癸丑島夷蹂海上武
備積衰人心懼怯寇未至而先清野爭門死者數十人

文祿聞之惻然乃佩劔詣軍門說大將軍背城一戰
寇魄以壯士氣然後危城可守大將軍然其計列陣於
野寇駟不敢攻而城守乃完萬曆辛巳均田之議起
權貴家且有嚙嗜文祿聞之勃然復佩劔躋公堂調
邑大夫畫地指天道所以均田然復不均處輒拔劔而舞曰
吾以三尺底小民有勢挾者請以劔擊之諸權貴皆
首莫敢撓鄉人蒙其利至今文祿之蚩大都如此年
三十與計偕迄八十無弗與者愈不售而愈發憤愈毫而
愈精進讀書徹日夜不止家人憐而尼之則曰汝何知

我讀來世書耳聞者絕倒文祿則正襟危坐而論之曰
生死且暮耳不讀書聞道則虛生浪死吾華草乾死庶
幾或聞寧爲聲名勞七尺耶卒之日手不廢書邑大夫
奔而訣執手問後事但笑無所言三問之則曰此不足
計遂拱而逝文祿生平樂善尤喜成就後生有所聞見
輒諄復相告八十九年如一日若乃真心灑氣直性無
前妙契疾書以爲己任則又非公不至非正不由發憤
所爲頑譴辟易嘗謂佛老二氏宜共一家教本互傳道
無殊致惜乎論述未成而竟齋志以歿也歿而無子文

多散佚者。惟百陵學山王生藝草行於世。歿後三十餘年。鄉人思之不置。歲時伏臘。往往醺金奠墓下。洒泣而歎曰。今安得復有蚩如王先生者。爲吾儕造福也。因相與私謚之曰文定先生。

司訓許來風梧

子煥孫應達附

許梧字來風嘉興人。事父母孝。父嘗病疽。額天乞以身代。濱危而竟獲全。人以其爲孝感。苦志博學。窮年兀兀。不以寒暑輟其功。屢試不售。僅以鄉貢。司訓通州。出其所學以教士。士多彬彬。會第四子煥成嘉靖庚戌進士。喜

曰吾平生未竟之志付之兒曹足矣奈何復以一儒官
踟躕人轅下耶卽疏病乞歸杜門吟咏歲賓鄉飲者凡
十三年以孫應遠貴贈中大夫

南川先生呂程

呂程秀水人登嘉靖癸丑進士第真率簡易惟務讀書
既釋褐初授司理不樂爰書甫三日卽解綬歸受徒講
學足未嘗一履公庭時人稱爲南川先生

劉大聲鍾

子振宗附

劉鍾字大聲嘉興人弱冠有聲費序食貧資廩饋以供

甘旨弟程未娶積脩金與締婚入其家怡怡然或勸之
仕。慨曰。我不能及親而仕。今胡爲五斗折腰。惟杜門
著書教子若孫。躬修澹泊。享年八十有三。子振宗。儒官。
人稱爲古君子。

邵武同知諸子相燮

諸燮字子相。餘姚人。少卓穎。負奇氣。稍長。下帷究經義。
爲舉子業。桂。馴。超。邁。一洗陳言。登嘉靖乙未進士。授兵
部主事。守山海。以簡亢忤。遷邊大僚。竟爲所中。謫茶陵
同知。不上事。南歸。居錢塘。遠近士慕燮經學。執贄受業。

者百餘人。熒喜因不復有仕進意。踰年朝議訕之。量移
潮州通判。所知皆致書勸駕。始隨牒往。三年。晉邵武同
知。兩倅郡。皆寬簡。御下勤於勸學。氓士胥懷之。及以艱
歸。有自閩粵負笈來學者。輒館穀之。不靳也。以是從遊
者益衆。開化諸士走請傳經於其邑。六月。廷棹過嚴陵。
滄足灘上。溺水死。歸柩錢塘。弟子皆失聲哭。非錢塘石
尾山子孫遂爲錢塘人。熒深於經學。耻立門戶。指取高
第。有進用階而脫略。自喜恬於華寵。標度不耐羈縛。恒
布素行街市中。若無名號者。歷官五品。惟以授經給生。

訂其介守可知

教授施一元乾

施乾字一元桐鄉人少愿樣不好弄補博士弟子員其
既異等應歲薦上禮部初授懷遠司訓轉晉陵再轉濮
州教授能慎取與辨析名義諸弟子瞿然顧化在濮時
守相多故人一切避影無所援繫監司檄視平陰篆乾
一再辭不獲輒引疾人服其能守官以殉義云

鶴洲先生黃子重裳

黃裳字子重錢塘人爲諸生祭酒勤學博聞於六經諸

史無所不窺而發爲文章務沃實造唯耻襲浮詭以爲
工。四方之士執經問義者屢戶爲滿。性淳介而家亦貧。
舌耕所獲竭力甘脆。祭外與兄弟共之。母事瞽媪而
子畜從子汝淳。與子汝亨等敦信篤行。里中化之。有不
軌於行者咸閉匿。自訟曰。幸毋使黃先生知。論者以爲
王彥方司馬德操之流。辛卯汝亨舉於鄉。裳不色喜。顧
語之曰。吾家儒素而世積德。必有以文學顯者。然吾困
諸生以老而孺子復以晚成。雖然閱歷多矣。今而後不
以吾憂者非吾子也。汝亨益刻勵德學。與譽望益隆。執

多稱弟子者半天下每攝臯比聽講者常數百人裳乃
翁蘇然喜曰吾兒以游刃治寬解政業在一時吾兒以
木鐸振聾聵學業在後世今而後果以吾憂者真吾子
也目可以瞑矣遂卒年七十學者稱為鶴洲先生

學正魯元承烈

魯烈字元承平湖人。事父孝。待宗族有恩。任吳江訓導。
諸生貧者輒周之。遇荒設粥救飢。仍捐俸糴米百石以
助賑。當世重其行。薦剡交上。陞澧州學正。駸駸濟用矣。
而烈乃浩然有歸志。遂引年。日以詩文陶寫於勢利淡

如也。平生所置田僅六十畝。仕後割其半以贈兄弟。茹苦若甘。終身靡懈。人稱篤行君子。

教授咸元輔

弟元弼元佐附

咸元輔秀水人。以春秋登嘉靖癸丑進士。與弟元弼元佐相切磋。元佐亦成進士。遂以世經名其堂。元輔性質。愿與世齟齬不合。獨抱一經。自娛官終撫州教授。遺孤淪落不偶。人共惜之。

朱汝賢賢

子廷侯孫廷益附

朱賢字汝賢。自嘉善徙居秀水。幼通經術。弱冠補博士。

弟子試輒高等，已需貢，念其儻貧老而格小，沮避之，使自爲計。越四年，乃貢。歷校官二十年，精俸貲僅二百金。有田爲宗人所市，持金去，賢笑而弗問。爲焚其券，蕭比部嘗從賢受經，以讞獄至，有大姓坐法論死，行數百金求末減，賢力却之。蕭意將因事以報，終不得其間而別。其清恭類如此。享年九十有七。子達侯，生而敏慧，韶年籍爲諸生，有文譽。隨廩於學官，爲人剛方，動依尺度。以歲薦，遷寧國司訓，遷六合。正身執士，謝絕脩脯，當道重之。性至孝，母病，徒步數十里求醫，夜蓆藁床，下聞聲卽

起調榮廉進以爲常及卒毀瘠踰禮晚居父喪猶蒸蒸
無慕訓子廷益成進士歷南京通政司通議卒於官

教授卜宗周鎬

子相附

卜鎬字宗周秀水人少篤志好學弱冠廩於學宮文譽
蔚起執經問義者無不北而稱弟子鎬隨方辨析各厭
所欲而去藉其餘以成進士者十餘人獨鎬屢試弗售
至嘉靖丙寅始以歲薦除定遠訓導歷青田教諭擢教
授九江所至出其所自易者以勸諸生諸生翕然歸之
居九江甫半載幡然與尊師之恩當道慰留再三不變

也會其子相任雲南叅議賚捧便道迎歸里門隨乞補封北部郎稱封公者十餘年以壽卒

姚坦之履道

姚履道字坦之秀水人天性孝友通今博古工文辭弱冠補弟子員試輒冠軍從游者如市食廩餼三十餘年砥礪苦節如一日道傍有遺金俟其主還之鄉評稱其長者每與門人講性理之學多發先儒之所未發課子思仁成進士臨歿諄諄勉子以忠報國既而思仁爲御史有直聲歷官大司空朝野推重者皆云思孝之賢得

之庭訓爲多。

訓導朱汝明愚

父鳳附

朱愚字汝明嘉善人父鳳司訓興化歷官邵武教授坐無寒理終身澹泊愚博學善詩文少負氣節曾上書規郭縣令郭爲謝過且表其書於門平生議論侃侃不苟言笑後任松江府訓導不受餽遺清操凜然說者稱愚能不頹父風卒年七十有八。

文莊先生胡希華榮

胡榮字希華浦江人居家孝友名動鄉閭蒐獵百家旁

通九藝樂潛味道玉立於風塵之表日擁書萬卷反覆
披尋更不知人世南面百城之貴也守令高其行無不
造門請益年七十以微疾終門人私謚之曰文莊先生
所著有澱州漁唱集

福建僉事王汝學宗聖

王宗聖字汝學義烏人由進士授興化府教授陞國子
監助教累官福建按察司僉事倭寇猖獗調遣有功急
流勇退再疏乞休歸築室繡湖之濱四方學者多就之
質疑問難各厭所欲而去督學使者禮聘講學於明倫

堂與邑令趙大河發明經權忠恕之義聞者稱服所著有濱河稿五十卷權政記十五卷太極圖跋等書

海屋先生姚翔卿翼

姚翼字翔卿高郵州判官旭之子少爲名諸生從歸安武進兩唐先生游兩先生者許爲入室弟子以故歸試輒冠其曹顧數奇屢省試屢不售年四十九始及貢授新淦縣學訓導輒出故所師事兩先生者砥諸生諸生翁然以最特徙黃州府學教授未幾遷廣濟縣知縣卽移故所訓新淦者奮袂其間而孤行一意惟民之利病

是視他所齟而齟之與岸而視之者胥不顧也縣之俗
數以族屬相婚姻翼下教曰同姓婚姻百世不通周公
之教也族屬爲媾人而禽矣除故婚魯及產男若女者
免科餘不得違教違者並坐罪以差已而又聞布衣吳
自守稍能服行古之禮者也於是單車就其廬風勵百
姓百姓大悅吏無遺牘庭無留獄翼數以垂午退食而
臥故扁其署曰臥齋當是時翼之聲滿楚上諸州郡聞
然翼之氣多岸楚賢諸二千石稔知翼故數並書翼之
治與行以聞而他岸視翼者亦或陰以睚眦翼楚之賢

士大夫若耿中丞輩相與分庭抗禮爲莫逆交徧爲聲稱諸公卿間而他相異同者亦啾啾焉郵翼矣翼於是亦倦宦游卽上書免官去歸尔乎茗上僅傍南城屋數楹圖書數卷客或過之蕭然四壁立時脫故袍帶貰酒間或藉請文者之橐以接轄爲歡耳其事高郵公及母仰孺人以孝稱沒而寢苦枕塊毀且骨立傾家營葬不敢以貧故儉其親其他冠婚及春秋蒸嘗並綿叢古曲禮其躬行古道類如此卒年六十有九所纂有歷朝文選所著有師友淵源錄晚尤好易題其讀書處曰玩書

齊學者因其自號稱之曰海屋先生

兩浙名賢錄卷之二終